

## **Ida Brunner Turitg / Sedrun**

### **5-11-1908 - 28-08-1998**

Ins astga bein dir che paucs en Tujetsch han enconuschiu la Ida, ni seregurdavan dad ella. Bein ha ella passentau treis onns da scola e sia giuventetgna cheu en nos-  
sa val ed era la sera dalla veta, mo il pli  
liung temps eis ella stada naven a Turitg.

Igl onn 1908 ils 5 da december eis ella naschida ad Arbon. Siu bab Eugen Tschümperlin era da leu, sia mumma, Annamaria Nay era da Tavanasa. Las ragischs romontschas dalla mumma ein stadas aschi fermas che la giuvna famiglia ha encuretg lavur en tiara grischuna. Aschia eis ei sedau ch' els ein turnai a Tavanasa. Il bab ha surpriu leu la guardia barriera dalla viafier ferton che la mumma mava a schubergiar. Entgins onns pli tard ei la viafier Furka-Alpsu vegnida aviarta. Cheu surpren la mumma la piazza da caustaziun, ferton ch'il bab va fadigar il paun da mintgadi tier la medema interpresa sco «cramper».

Els han giu quater affons: La Marili che ha maridau pli tard il Karl Groth. Ella ha empriu da caustaziun da sia mumma e mussau la medema lavur a siu mariu aschia ch'els ein stai successors da lur geniturs. In auter fegl il Toni Tschümperlin ei setratgs giu la bassa a Thal SG ed igl Eugen Tschümperlin ha en la medema piazza anflau lavur serendius pli tard sur mar. Leu eis el maridaus e fundau famiglia en l'Argentina.

La Ida ha frequentau las usitadas scolas dalla val e suenter ha ei giu num encuir lavur e fadigia per saver star sin las atgnas combas. Cun lavurs en hotels en la val e lu giu la bassa tier famiglias eis ella ida pli e pli naven da sia patria. A Turitg fa ella enconuschientscha cun Ernst Brunner che luvrava tier la firma Ober sco electricist da casa. Els maridan e secasan el marcau da Turitg. La ventira d'affons han els buca giu. En la vegliadetgna ei siu um vegnius cargaus d' ina greva malsogna. La Ida tgira el entochen sia mort igl onn 1980.



Avon entgins onns vegn la Ida surprida d'ina attacca dil cor che sforza ella da far pli plaun ed igl ei vegniu aschi lunsch ch'ei ha dau neginas otras vias che serender en ina casa da vegls. Igl emprem a Curaglia e cura ch'ei ha giu plaz a Sedrun. Ella ha fatg vess, fetg vess. Il schar encrescher per Turitg, per siu um, per siu dacasa ha mudergiau ella pir che mai. Con bugen havess ella priu valischa e tut e turnada a casa. A casa ch'era buca pli.

Igl aunghel dalla mort ha levgiau ella da tuttas grevezias terrestras e schenghegiau ad ella in seveser cun tuts ils ses.